

Cosmographie Vniuerselle

l'Antarctique
cha l'Antarctique
de la Ne-
florien.
Synode, que deuoit tenir leur *Photierarcha*, ſçauoir Patriarche, *Gafsihs*, & *Ephesophos*, qui ſont leurs Archeueſques & Eueſques, en l'Isle de *Gizere*, ſituee en la riuere *Detgelé*, que nommons le Tygre. Ceste Isle d'*Alfobatta* eſt diſtante de celle de *Curia-muria*, de laquelle i'ay parlé en mon hiſtoire d'Asie, d'environ quarante trois lieues par mer: & ainſi demurerent ces pauures gens vingt ſix mois en ce lieu ſolitaire, habité ſeulement de quelques oyſeaux paſſagers, & autres qui ſont là leurs petits, ayans veſcu touſiours des œufs d'iceux, & de ceux des Tortues marines: leur breuuage eſtoit d'eau qu'ils trouuoient ſur les rochers: & faiſoient cuire leur viande au Soleil, attendans l'ayde de celuy qui les maintenoit & nourriſſoit de ſi peu de choſe. Aduint que deux nauires d'Indiens, vindrent ſurgir en l'Isle, pour y faire aiguade, ou chercher de l'eau. Deuant que mettre pied en terre, ſ'apperceuant de loing de ce venerable Eueſque & deux de ſes compaignons, avec leurs barbes blanches & viſages fort maigres, ils eurent grand fraieur, penſans que ce fuſſent quelques monſtres Sauvages qui habitoient ce lieu là. Incontinent ſes eſtrangers prindrent leurs fleſches, ſymetaires, & autres baſtons de deſſence, pour combattre ces trois exillez, ſ'ils ſe mettoient en deſſence, ou ne leur vouloit donner de l'eau. Mais les accoſtant de pres, congneurent incontinent qu'ils n'eſtoient trop mauuais garçons, tant par leur face bleſme, que par leur ſimplicité: Et leur ayant cōpté leurs fortunes, & comme les choſes ſ'eſtoient paſſees, les Indiens les receurent humainement dans leurs vaiſſeaux, puis les conduirent en l'Isle d'Ormuz. La choſe aduint lors que ie viſitois les ſingularitez de Grece, où ie demuray trois ans ou enuiron, & vous ay bien voulu faire ceste diſcretion d'autant qu'elle venoit à propos pour ne rien oublier en mes obſeruations. Voila dont les merueilles de ce pays Septentrional, & comme Sathan y exerce ſa tyrannie, puis que viſiblement & à ſon aïſe il y tourmente les hommes de telle ſorte, qu'ils ſoient contrainctz de vuidier leurs terres, & ſe retirer ailleurs, comme i'ay dit de ceste Isle des Demons.

Des Iſles des ESSORES, des Caps, Riuieres, & goulfres comprins depuis le deſtroict
Aſtral iuſques aux Iſles de Grœnlant. Enſemble la diſtance des lieues.

CHAPITRE

VII.

DES LVSIEURS qui vouloyent perſiſter en la diuiſion faite par les Anciens, des parties du monde, ont voulu compter ceste partie de l'Antarctique ſous le nom de l'Asie. Mais ie ne ſçay où ils pourroyent prendre leur argument, pour faire preuue de leur dire, veu que les limites d'icelle ne ſ'eſtendent pas ſi auant, entant que ces troys parties, Afrique, Asie, & Europe, ont leur cas borné par les Anciens Geographes. Parainſi ne fault qu'ils trouuent eſtrange, ſi on baille nouveau nom à ce qui a eſté nouuellement trouué, & depuis leur diuiſion faite. A ceste cauſe, eſtât la terre partie en deux moitez eſgales, & deſquelles on a eu congnoiſſance, quoy que non du tout, ſ'enſuyt que ce que i'ay deſcrit depuis le deſtroict Aſtral, iuſques à la liſte de la terre de Labrador & terre de Gruthlande eſt l'autre moitié, parfait ſon rond: & par conſequent, ce n'eſt point choſe impertinente de dire, que ce ſoit vn nouveau monde, ayant reſpect à la deſcouuerte, & non point à quelque nouvelle creation, veu que le monde eſt tout tel qu'il fut lors qu'il fut crée, à ſçauoir accōply en ſes parties, entouré d'eau, & embrasſé par le Ciel. Je diſ cecy, pour